

Hestamannafélagið Jökull

Ársskýrsla 2025

Eins og undanfarin ár eru námskeið ríkjandi þáttur í vetrarstarfi Jökuls. Bæði eru haldin fullorðinsnámskeið en æskulýðsdeild hestamannafélagsins sinnir góðu og öflugu námskeiðshaldi fyrir yngstu félagsmenn, heldur úti fræðslukvöldum og skemmtikvöldum sem og tekur þátt í samstarfi um mótahald við önnur hestamannafélög í nágreninu.

Uppsveitadeildin hófst í byrjun febrúar og þá með breyttu sniði á þann veg að lögð var áhersla á að hvetja heimamenn til að söðla gæðinga sína og skrá sig til leiks.

Uppsveitadeildin er mótaröð þar sem keppt er í fjórgangi, fimmgangi og að síðustu í tölti. Keppendur skrá sig í lið og samanstendur hvert lið af áhugamönnum og atvinnumönnum og er með þeim hætti verið að höfða til þeirrar breiddar sem er í þessari íþrótt. Skemmst er frá að segja að Uppsveitadeildin tókst einkar vel og fylltu áhugafólk, aðstandendur og félagsmenn stúkuna öll kvöldin og er óhætt að segja að félagsmenn séu sannarlega vel ríðandi.

Aðalfundurinn var haldinn 27. febrúar í reiðhöllinni á Flúðum. Góð mæting var á fundinn en engar mannabreytingar urðu í stjórn. Stjórn skipar sem áður: Bragi Víðar Gunnarsson formaður, Ólafur Gunnarsson gjaldkeri, Vilborg Ástráðsdóttir ritari, Guðrún K.

Snæbjörnsdóttir, Ragnheiður Eggertsdóttir, Ragnhildur S. Eypórsdóttir og Svavar JónBjarnason meðstjórnendur. Fastur liður á aðalfundi er að æskulýðsnefndin haldi kynningu um starf liðandi árs, en starf nefndarinnar er með eindæmum gott og ötult og eiga nefndarkonur miklar þakkir skilið.

Vetrarmót eru einnig fastur liður í starfi félagsins og tókust þau einnig með þrýði. Þar fá pollar, börn, unglingar og ungmenni einnig að spreyta sig í keppni og er það alltaf góð og mikilvæg reynsla.

Hestamannafélaginu Jökli barst vegleg gjöf frá Hrossaræktarfélagi Hrunamanna en það var ágóði af happadrætti sem var haldið á folaldasýningu í mars. Stjórn Hrossaræktarsambandsins bætti um betur og tvöfaldaði upphæðina og gaf til æskulýðsstarfs Jökuls.

Firmakeppnin fór fram í blíðskapar veðri að vanda og sem áður grillaði skemmtinefndin pulsar í gesti og keppendur.

Æskulýðsnefndin hélt sín árlegu sumarnámskeið í Hrísholti annars vegar og Miðengi hins vegar, en þetta er síðasta árið sem námskeið verður haldið í Hrísholti og er mikil eftirsjá af þeim stað en líka þökk fyrir góða aðstöðu.

Tveir kvöldreiðtúrar voru skipulagðir af útreiðanefndinni annar í gamla Gnúpverjahreppnum en hinn í Tungunum. Einnig var farið í stórskemmtilega kvennareið á Kvennafrídaginn.

Gæðingamótið okkar var haldið 23.-27.júlí og tókst það afar vel. Gæðingamótið er sannarlega einn af okkar stærstu viðburðum og er stærsta gæðingamót landsins fyrir utan Landsmótið sjálft. Veðurguðirnir léku við hvern sinn fingur og er það sannarlega góð viðbót á keppnisdögum. Þetta gæðingamót er opið öllum og koma fjölmargir úr öðrum hestamannafélögum keyrandi að um langar leiðir til að taka þátt í þessu góða móti. Mót sem þetta kallar á marga sjálfboðaliða og er þeim öllum þakkað af heilum hug.

Vallarmót á Laugarvatni er stórskemmtilegt öðruvísi mót þar sem lögð er rík áhersla á að yngsta kynslóðin fái að njóta sín, enda er það líka lokapunktur á námskeiði sem er haldið í Miðengi, sem fylgt er úr hlaði með útreiðartúr í Kringlumýri þar sem börnin gista og fara síðan ríðandi á Vellina þar sem mótið sjálft er haldið. Mót sem þessi eru mikilvæg hefð sem ekki má með nokkru móti fjara undan, en á undir högg að sækja vegna þess að það stólar á óeigingjart starf sjálfboðaliða.

Árshátíð Jökuls var haldin með pompi og prakt í Árnesi og er litið á hana sem uppskeruhátíð félagsmanna því maður er mans gaman, sérstaklega ef hann er hestamaður.

Að lokum var haldin Skötuveisla í Reiðhöllinni annað árið og tókst hún ekki síður vel. Skötuveislan hefur þann tilgang að vera fjáröflun fyrir Reiðhöllina sjálfa. Á það sama við þá veislu eins og aðra viðburði, að hún getur ekki gengið upp nema að, að þeim komi öflugur hópur sjálfboðaliða sem er tilbúin til að leggja sitt á vogarskálirnar.

fh. stjórnar Jökuls

Vilborg M. Ástráðsdóttir
ritari